


WANAFUNZI WANAOKUA



JUMA LA MAOMBI

NOVEMBER 2022

Mtafsiri: Moseti Chacha

UTANGULIZI



Yesu alialika kikundi kidogo cha wavuvi takribani miaka 2000 iliyopita katika pwani ya Galilaya akisema, “Nifuateni, nami nitawafanya kuwa wavuvi wa watu.” (Mathayo 4:11). Mara wakaacha nyavu zao na kumfuata. (fungu la 22). Kadiri walivyoendelea kuwa na Yesu, maisha yao yalibadilishwa milele.

Leo hii Yesu bado anawaita watu wawe wanafunzi wake. Kuwa mwanafunzi wa Yesu kunaanza kwa kumfuata – kutenga muda wa kuwa naye kupitia katika kujifunza Biblia na kuomba, ukifuata kuelekea kule anakoongoza. Tunamuona akiwaponya vipofu na viwete. Tunaona ari yake kadiri anavyosafisha hekalu, na upole wake anapobariki Watoto. Tunamwona anavyodhihirisha upendo wake kwa maadui na kuongoza marafiki zake. Sisi pia kama wale wanafunzi wa zamani, tunahusika kwa karibu sana na maagizo yake. Tunatazama kwa mshangao matukio ya wakati wa mwisho wa maisha yake hapa duniani. Wakati tukishangilia kufufuka kwake, bado tunaweza kutembea na wanafunzi wake kuelekea Emau kadiri alivyozungumza nao, “Akaanza kutoka Musa na manabii wote, akawaeleza katika maandiko yote mambo yaliyomhusu yeye mwenyewe.” (Luka 24:17).

Wakati ambao tumekuwa na Yesu (angalia Matendo 4:13), ndipo tulipokuwa tayari kukubali wito wake wa “Basi, enendeni, mkawafanye mataifa yote kuwa wanafunzi, mkiwabatiza kwa jina la Baba, na Mwana, na Roho Mtakatifu; na kuwafundisha kuyashika yote niliyowaamuru ninyi; na tazama, mimi nipo pamoja nanyi siku zote, hata ukamilifu wa dahari.” (Mathayo 28:19, 20)

Ninawakaribisha kutenga muda maalum wa kuwa na Yesu katika kipindi cha juma hili la maombi, kadiri tunavyofikiria kwa uangalifu maana ya kumfuata Yeye.

Ted N. C. Wilson, Mwenyekiti

Konferensi Kuu ya Kanisa la Waadventista wa Sabato.

NITAKWENDA KUWAFANYA WANAFUNZI



UANAFUNZI NA UTUME WA KANISA

Na Ted N. C. Wilson

Miaka 2,000 iliyopita majira ya masika katika vilima vya Galilaya, Yesu aliyefufuka alikutana na wanafunzi wake, pamoja na wafuasi wengine wapatao mia moja, ili kuwapatia maagizo muhimu ya namna ya kuendeleza utume alioanza, katika kufikia roho kwa ajili ya ufalme wa mbinguni. Kwa wengi waliokuwapo pale, huu ulikuwa ni wakati pekee wa kumwona Bwana na kumsikia moja kwa moja tangu alipofufuka.

Tunaambiwa katika Maandiko kuhusu huu mkutano kwamba, “Kristo mwenyewe kabla ya kifo chake alikuwa amepanga wakati na mahali pa kukutana. Yule malaika pale kaburini aliwakumbusha wanafunzi waliokuwapo kuhusu ahadi yake ya kukutana naye kule Galilaya. Ahadi ilirudiwa kwa waumini ambao walikuwa wamekusanyika Yerusalemu katika lile juma la pasaka, na kupitia kwao Habari ziliwafikia wengi walioonekana wapweke wakiomboleza kifo cha Bwana wao. Kwa shauku kubwa wote walitazamia mahojiano hayo.”¹

Kadiri watu walivyokusanyika katika kilima cha Galilaya, ghafla Yesu alitokea kati yao. Walimsikiliza kwa hofu akitamka mwenyewe agizo mashuhuri lililoandikwa katika Mathayo 28:18-20 “Nimepewa mamlaka yote mbinguni na duniani. Basi, enendeni, mkawafanye mataifa yote kuwa wanafunzi, mkiwabatiza kwa jina la Baba, na Mwana, na Roho Mtakatifu; na kuwafundisha kuyashika yote niliyowaamuru ninyi; na tazama, mimi nipo pamoja nanyi siku zote, hata ukamilifu wa dahari.”

MWANZO WA UTUME WA KANISA

Kuna tukio jingine lilitokea miaka mitatu kabla katika kilima hicho cha Galilaya. Maandiko ya uvuvio yanatuambia kuwa, “Ilikuwa ni katika kuwekwa wakfu kwa wale kumi na wawili ndipo kwa mara ya kwanza kanisa lilianzishwa, ambalo baada ya Yesu kuondoka lingendeleza kazi yake hapa duniani. Katika kuwekwa wakfu kwa hao wanafunzi, kumbukumbu zinatambia kuwa, “Akapanda mlimani, akawaita aliowataka mwenyewe; wakamwendea. Akaweka watu kumi na wawili, wapate kuwa pamoja naye, na kwamba awatume kuhubiri,”² Marko 3:13, 14

Hawa wanafunzi kumi na wawili walipata bahati ya kuandamana na Yesu kila siku, wakisikiliza mafundisho yake, wakimwona katika utendaji, wakijifunza kwa mifano yake. “Kwa miaka itatu na nusu hawa wanafunzi walikuwa chini ya usimamizi wa Mwalimu Mkuu ambaye ulimwengu umewahi kumfahamu.” Yesu aliwafundisha kwa mguso binafsi na kwa ushirikiano kwa ajili ya

¹ Ellen G. White, *The Desire of Ages* (Mountain View, Calif.: Pacific Press Pub. Assn., 1898, 1940), uk. 818.

² Ellen G. White, *The Acts of the Apostles* (Mountain View, Calif.: Pacific Press Pub. Assn., 1911), uk. 18.

utumishi wake. Walitembea na kuzungumza naye siku baada ya siku... Hakuwaamuru wanafunzi hao kuwa wafanye hichi au kile, bali aliwaambia “Nifuate”³

Hawa wanafunzi walitakiwa kwenda kama mashahidi wa Yesu, wakitangaza kile walichoona na kusikia kutoka kwake. Walipaswa kufundisha na kuelimisha wengine, wakiwatuma kwenda kushiriki ujumbe wa injili. Na ili waweze kufanya hivi, walipewa nguvu za Roho Mtakatifu.

WITO KWA WAUMINI WOTE.

Na sasa kwa mara nyingine tena, chini ya kilima, Kristo aliyefufuka alikuwa anawapatia utume wa injili, siyo tu wale aliowachagua kama viongozi wa kanisa,⁴ bali waumini wote kila mahali. Yesu akielekeza macho yao mbinguni, akatamka kwamba kazi yake hapa duniani ilikuwa imekamili, na kwamba alikuwa anarudi mbinguni kwa Baba. Akiwahakikishia wafuasi wake kuwa, “Nimepewa mamlaka yote mbinguni na duniani.” Alifafanua utume wa kanisa lake, alieleza kupitia katika jicho la wanafunzi, kubatiza kwa jina la Baba, Mwana, na Roho Mtakatifu, na kuwafundisha kuyashika yote aliyokuwa amewaagiza.” (Mathayo 28:20)

Hakuna wito mkubwa kuliko ule wa kuwa mwanafunzi wa Yesu Kristo. Kwa maneno mengine, lengo la kila mwanafunzi wa kweli ni kuwa kama Yesu. Akiwa pale mlimani katika hotuba yake aliwaambia kwamba “Mwanafunzi hawi mkuu kuliko mwalimu wake, lakini kila mtu ambaye amehitimu hulingana na mwalimu wake.” (Luka 6:40)

Na huu wito kwa wanafunzi wake, huu utume kwa kanisa, unalenga maeneo mapana zaidi – ukijumuisha mataifa yote. Pamoja na kwamba huu ulikuwa ni ufunuo wa kushangaza kwa mamia ya wafuasi waliokuwa wameketi chini ya kilima kile cha Galilaya, Yesu alikuwa tayari amewaonesha kwamba injili ililenga siyo Wayahudi peke yao. Alikuwa amehudumia Wasamaria, Warumi, na watu wa Mataifa mengine kama vile yule mwanamke Msirofoenike na Myunani aliyemfuata Yesu akitaka amponye binti yake.

KAZI TAKATIFU

Baada ya kupokea agizo la Kristo, wafuasi wake waliondoka kwenda kushuhudia, kwanza kwa wale waliokuwa karibu nao – ndugu wa karibu, marafiki, majirani, wakieneza nje zaidi. Mwanafunzi mmoja aliyekuwa amejitoa kikamilifu alikuwa ni Tabitha, aliyefahamika pia kama Dorkas.

“Huyu alikuwa ni mwanafunzi stahiki wa Yesu, maisha yake yalipambwa kwa matendo mema ya kutoa msaada na wema kwa masikini na wenye majonzi, akionesha ari katika njia ya kweli. Kifo chake kilionekana kama upotevu mkubwa, kanisa lililokuwa changa halikuweza kuachia

³ Ellen G. White, *The Desire of Ages* (Mountain View, Calif.: Pacific Press Pub. Assn., 1898, 1940), uk. 18.

⁴ Ellen G. White, *The Desire of Ages* (Mountain View, Calif.: Pacific Press Pub. Assn., 1898, 1940), uk. 17, 19

jitihada zake zilizotukuka.”⁵ Uanafunzi wake ulikuwa na jukumu muhimu katika utume wa kanisa hilo la awali kiasi kwamba alipofariki, Mungu alifanya muujiza kupitia kwa mtume Petro kurejesha uhai wake. (tazama Matendo 9:36-42)

Kadiri kanisa lilivyoendelea kukua, wafuasi wa Kristo walianza kutambua upeo wa wito wao kwa namna ulivyodhihirishwa na Paulo akiwalenga wanaume wa Athene na kilima cha Mars: “Naye alifanya kila taifa la wanadamu kutoka katika mmoja, wakae juu ya uso wa nchi yote, akiisha kuwawekea nyakati alizoziamuru tangu zamani, na mipaka ya makazi yao; ili wamtafute Mungu, ingawa ni kwa kupapasa-papasa, wakamwone, ijapokuwa hawi mbali na kila mmoja wetu.” (Matendo 17:26, 27)

Katika vizazi vyote Mungu amekuwa akiongoza kanisa lake kadiri ujumbe wake ulivyoendelea kupitishwa kutoka kwa mwanafunzi mmoja kwenda kwa mwanafunzi mwingine, wakati mwingine kwa gharama ya uhai wao, kwa kuwafanya wanafunzi, kufundisha Neno la Mungu, wakibatiza kwa jina la Baba, Mwana, na Roho Mtakatifu huku wakiwalea kama Yesu alivyofanya.

FADHILA ZETU

Leo hii, ni fadhila kiasi gani kuwa sehemu ya Utume Mkuu na kilio kikuu cha mwisho kwa ulimwengu, ukishiriki injili ya milele kwa muktadha wa Malaika watatu wa Ufunuo 14! Ellen G. White anaunganisha Utume Mkuu na ujumbe wa Malaika watatu kwa namna dhahiri yenye nguvu kuwa:

“Kanisa la Waadventista wa Sabato kwa namna maalum limewekwa ulimwenguni kama mlinzi na nuru kwa watu. Kanisa limepewa maonyo ya mwisho kwa ulimwengu unaoangamia. Kuna nuru ya ajabu inaangaza juu yake kutoka katika Neno la Mungu. Wamepewa kazi yenye umuhimu usio wa kawaida – kazi ya kutangaza ujumbe wa Malaika wa kwanza, wa pili, na wa tatu. Hakuna kazi nyingine iliyo muhimu kuliko hii. Hawapaswi kuruhusu kitu kingine kiteke usikuvu wao.

“Ujumbe muhimu uliowahi kudhaminiwa kwa wanadamu umetolewa kwetu ili tuutangaze ulimwenguni. Kazi yetu kubwa inatakiwa iwe ni kuutangaza ukweli huu. Ulimwengu ni lazima uonywe, na watu wa Mungu ni lazima wawe waaminifu kwa dhamana waliyopewa....

“Tunatakiwa kuwa mifereji iliyowekwa wakfu, itakayopitisha uhai wa kimbangu kwenda kwa wengine. Roho Mtakatifu atahuisha kanisa zima, akitakasa na kuthibitisha mioyo. Wale ambao tayari wamekwisha kuzikwa pamoja na Kristo katika ubatizo wanapaswa kuinuka katika upya wa maisha, wakileta uwakilishi mpya wa uhai wa Kristo. Kuna wajibu mtakatifu uliowekwa

⁵ Ellen G. White, *The Spirit of Prophecy* (Battle Creek, Mich.: Seventh-day Adventist Pub. Assn., 1878), vol. 3, p. 323.

kwetu... Tumetengwa ili kufanya kazi ya kufanya injili ya wokovu ifahamike. Ukamilifu wa kimbingu utakuwa ndiyo nguvu yenu.⁶

KUFANYA WANAFUNZI – NI MCHAKATO

Kufanya wanafunzi ni mchakato. Ni zaidi ya kuendesha mfululizo wa mikutano ya injili, pamoja na umuhimu wake. Ni zaidi ya kulisha wasio na makazi, kufanya usafi wa mazingira, kuendesha kambi la afya, au kuendesha masomo ya Biblia, pamoja na umuhimu wa shughuli zote hizo.

Hatua ya kwanza katika mchakato wa kufanya wanafunzi ni kwa sisi wenyewe kuwa wanafunzi. “Ni lazima tujifunze kielelezo, na kuwa kama Yesu, ambaye alikuwa mpole na mnyenyekevu wa moyo, safi bila waa lolote.”⁷ Jinsi tunavyofanya, kwa kutenga muda wa kuwa naye kila siku – tukijifunza Neno lake, kutafakari maana yake, tukiwasiliana naye kupitia katika maombi, na kwa uwezo wake tukijisalimisha kwake na kutii amri zake. Neema ya Kristo ni nguvu ibadilishayo, ikitubadilisha kutoka katika kuwa wasilizaji hadi watendaji wa Neno la Mungu.

Hatua ya pili kama ilivyodhihirishwa katika maisha ya wanafunzi wa awali, ni kushiriki na wengine uzoefu ambao sisi wenyewe tumeupata – kile ambacho tumeona na kusikia katika kutembea na Yesu, tukiwakaribisha na kuwaambia kuwa, “Onjeni mwone ya kuwa Bwana yu mwema; Heri mtu yule anayemtumaini” (Zaburi 34:8). Na mara wanapotoa maisha yao kupitia katika ubatizo, hawa wapya katika Imani bado wanahitaji kufundishwa kupitia katika malezi ya wanafunzi walio wazoefu katika Imani.

Vitendea kazi bora kabisa vinavyotoa mwongozo kamili wa jinsi ya kufanya wanafunzi na mchakato wa kuwalea vimeandaliwa na Idara ya Shule ya Sabato na Huduma Binafsi ya Konferensi Kuu ya kanisa la Waadventista wa Sabato. Kitabu cha “Mwongozo – Huduma Binafsi” kinapatikana kwa Kiswahili. Hiki ni kitabu chenye maneno mafupi lakini ni mbaraka usio wa kawaida kwa washiriki wapya na hata wale wa zamani.

Kama tu ilivyokuwa kwa nyakati za Agano Jipya, kupeleka utume wa kanisa kunahusu kila mmoja wa washiriki wa kanisa – siyo mchungaji peke yake wala wainjilisti tu, wala viongozi wengine tu. Mungu anatukaribisha sote kupitia katika uwezo wake, kuwa wanafunzi wa Kristo, kisha kwenda na kufanya wanafunzi kwa ajili yake. Yesu anakuja, jihusishe!

⁶ Ellen G. White, *Testimonies for the Church* (Mountain View, Calif.: Pacific Press Pub. Assn., 1948), vol. 9, pp. 19, 20.

⁷ Ellen G. White, in *Signs of the Times*, Apr. 20, 1891.

Ted N. C. Wilson ni Mwenyekiti wa kanisa la kilimwengu la Waadventisa wa Sabato.

Maswali ya Tafakuri:

- Ninawezaje kuweka kipaumbele kwa muda binafsi wa kuwa na Kristo ili kupata uzoefu wa sauti yake na maagizo yake katika maisha yangu?
- Je, unafanana na Dorka, na matendo yake ya kimya kimya, au Paulo aliyeshiriki kanuni za ukweli kwa ujarsiri?
- Je, kuna mtu fulani katika kanisa lako mahalia ambaye unaweza kuwa na ukaribu naye, ukampatia msaada na kumlea katika kutembea kwake na Kristo?

MWANAFUNZI NI NINI?

Na Glenn Townend

Injili ya Marko inalieleza hili vyema kwa namna ya pekee, ni kisa:

“Wakafika Bethsaida, wakamletea kipofu, wakamsihi amguse. Akamshika mkono yule kipofu, akamchukua nje ya kijiji, akamtemea mate ya macho, akamwekea mikono yake, akamwuliza, Waona kitu? Akatazama juu, akasema, Naona watu kama miti, inakwenda. Ndipo akaweka tena mikono yake juu ya macho yake, naye akatazama sana; akawa mzima, akaona vyote waziwazi.” (Marko 8:22-25)

Katika kila tukio la uponyaji, Yesu aliponya kwa kugusa mara moja, au kwa tamko la amri moja tu. Kwa nini katika tukio hili la huyu kipofu aliyeletwa kwake kuna haja ya kurejea mara ya pili kuweka mikono yake juu ya macho kabla mtu huyu hajapona?

Hebu chukulia mtiririko wa kisa hiki katika sura ya 8 ya Marko. Kabla ya maelezo yake, Yesu alikuwa amelisha watu elfu nne; hata hivyo Mafarisayo bado walitaka ishara. Katika kuitikia Yesu aliwaonya wanafunzi wake kuhusu “Chachu” ya Mafarisayo, akiashiria ukosefu wao wa Imani (fungu la 1-20). Kisha baada ya kumrejeshea uwezo wa kuona huyo mtu aliyekuwa kipofu, Yesu anawauliza wanafunzi wake swali la mwisho la Imani kuwa: “Na ninyi mnasema ya kuwa mimi ni nani?” (fungu la 29). Kwa hiyo muktadha wa kisa kizima ni Imani. Tambua kwamba ni watu wengine tu waliomleta yule kipofu kwa Yesu. Hawa watu ndio waliokuwa na Imani katika Yesu, wala siyo yule kipofu.

Nilipokuwa mtoto mwenye umri wa miaka 10 hivi, nilikuwa kipofu kwa muda baada ya kuangalia mwanga mkali kwa wale mafundi wanaochoamelea vyuma kwa umeme, pamoja na kwamba nilikatazwa kufanya hivyo. Niliamka asubuhi bila uwezo wa kuona – nilitishika sana. Ilibidi nitegemee familia yangu kunilisha, kuniogesha, hata kunivalisha na kuniongoza. Ilibidi niwaamini wao kama macho yangu.

Vivyo hivyo, Yesu alipomshika mkono yule kipofu na kumwongoza nje ya Kijiji, yule kipofu alianza kumwamini kama macho yake. Yesu alipomtemea mate ya macho, akamwekea mikono yake, akamuuliza, “Waona kitu?” Yule kipofu akasema, “Naona watu kama miti, inakwenda.” Imani yake katika Kristo iliongezeka. Ndipo akaweka tena mikono yake juu ya macho yake, naye akatazama sana; akawa mzima, akaona vyote waziwazi. Imani yake kwa Yesu kama mwanadamu, mponyaji, na mwenye uwezo wa kubadilisha maisha ikakamilika. Kupitia katika mchakato huu wa kujenga Imani, Yesu alimpitisha mtu huyu aliyekuwa na imani haba na kumwongoza katika mahali pa tumaini na Imani, hadi kumrejeshea uhai.

KUJIFUNZA KUWA MWANAFUNZI

Hivi ndivyo Yesu anavyofanya kazi na kila mmoja wetu. Anafahamu pale tulipo katika safari ya Imani yetu binafsi; hata kama tuna Imani ndogo kiasi gani, mradi tuko tayari. Yesu anaweza kutuongoza na kutupatia ushuhuda sahihi wa kuweza kujenga Imani yetu na tumaini letu kwake, kwamba atarejesha uhai wetu. Ndiyo maana ya kuwa mwanafunzi wa Yesu. Neno lililotafsiriwa kwa “Mwanafunzi” katika Agano Jipya, ni ‘*mathetes*’ ambalo limetoholewa kutoka katika kitenzi cha Kigiriki cha ‘kujifunza.’ Kwa hiyo, mwanafunzi wa Yesu ni mtu ambaye anajifunza kukuza tumaini na imani yake kwa Yesu na kurejeshwa naye.

Huu ulikuwa ndio mchakato waliofuata wale wanafunzi wa Yesu kumi na wawili. Aliwachagua wawe naye na kisha akawatuma (Marko 3:13-15). Kadiri walivyokuwa na Yesu, walijifunza kumwamini. Waliona jinsi anavyohusiana na watu kwa staha, kwa huruma, kwa ukweli – na watoto, wageni, wenye ukoma, Waandishi, wanawake, wale waliokuwa wakitafuta msaada kwake, na hata wale waliokuwa wana nia ya kumdhuru. Kutokana na huo muda waliokuwa na Yesu, walitumwa kwenda kufanya kile Yesu alichokuwa akifanya kwa kuingilia kati, wakiponya mahusiano, magonjwa, udhaifu wowote na hata kifo.

Walitakiwa kufundisha msamaha, kujitoa mhanga, kwa mabadiliko ya ndani ya moyo badala ya kufuata taratibu na sheria za nje. Wao kama Yesu, walipaswa kuhudumu na kuongoza kwa moyo wa utumishi badala ya sifa na ubinafsi, wakijielekeza katika thamani ya ndani na uwezo wa kila mmoja. Hatimaye, kwa sababu ya mafunzo na maelekezo ya Yesu, wanafunzi wote – kasoro mmoja – walikuwa viongozi wa harakati za kufanya na kuzidisha wanafunzi.

UANAFUNZI BINAFSI NI MCHAKATO.

Mchakato wa uanafunzi ni ule ule kwetu leo. Kama tunavyotenga muda wa kuwa na Yesu kwa kukusudia – kupitia katika tabia za makusudi za kusoma na kutafakari katika Maandiko, kuzungumza na kumsikiliza Mungu, kuwa na muda na asili, kupata pumziko la Sabato, kujenga tabia ya kushukuru...kadiri tunavyofanya hivyo, tunajifunza tabia ya kufikiri, kuamini, na kufanya tumaini na Imani katika Yesu. Kadiri uhusiano wetu na Yesu unavyokua na kadiri tunavyotambua kwamba Mungu ni pendo, tunajifunza kumpenda Mungu na kuwapenda wengine, kisha kujipenda wenyewe (Marko 12:30-33)

Ellen G. White ameandika kuwa, “Ni upendeleo kwako kukua katika neema, ukiendelea katika elimu na upendo wa Mungu, ikiwa utaendelea na mawasiliano matamu na Yesu, ni nafasi yako ya kufurahia.”⁸

Kama vile tu kwa wale kumi na wawili wa awali, sisi pia muda wetu “na Yesu” utaishia kwenye kutubadilisha tupate kufanana naye. Lakini, pamoja na kwamba kazi ya neema ya Mungu inaweza isiwe kamilifu, sisi pia tumetumwa kwenda kuakisi tabia ya Yesu kwa huruma, ukweli,

⁸ Ellen G. White, *God's Amazing Grace* (Washington, D.C.: Review and Herald Pub. Assn., 1973), p. 292.

na ushupavu. Tunaishi kwa ajili ya Yesu katika majumba yetu, mashuleni, sehemu za kazi, na katika jumuiya zetu ili kuleta mabadiliko hapo tulipo.

Kuna kisa kutoka Papua New Guinea kinachotupatia kielelezo cha mchakato. Wazee wa kanisa wawili katika kanisa la mji wa Madang waligundua kwamba kikundi cha vijana waliomaliza elimu ya Sekondari ambao hawakuwa na ajira kilikuwa kinaongezeka, wakati huo huo uhalifu na jinai viliongezeka katika maeneo hayo. Waliamua kuwapatia chakula hawa vijana waliokuwa ni vijana wa mitaani mara moja kila juma. Baada ya kipindi fulani waliwauliza hawa vijana kama wangependa kujiunga na kikundi cha kujifunza Biblia. Waliwaagiza kusoma Injili ya Marko, Luka na kitabu cha Matendo ya Mitume, wakiwapatia pia maswali ya kuwaongoza katika kujitambua. Baada ya muda, huku kuingiliana kuliwaongoza katika njozi ya huruma kwa watu kanisani, vitendo vya uhalifu na jinai vikapungua mjini, na baadhi ya vijana wa mitaani wakawa ni wanafunzi wa Yesu.

HITIMISHO

Divisheni na kusini mwa Pacific ina kauli mbiu: “Mwanafunzi ni mtu ambaye anajitahidi kuwa kama Yesu kwa kila namna” (Ikijengeka katika Waefeso 4:15). Tumegundua kwamba wanafunzi wa Yesu ni kazi endelevu, kwa sababu kuwa kama Yeye ni lengo “ambalo haliwezi kukamilika katika maisha haya, bali litakuwa endelevu hadi katika maisha yajayo.”⁹ Baadhi yao wana changamoto ya ustahimilivu, wengine zaka, wengine lugha, wengine vyakula wanavyokula, na wengine mwenendo... Hata hivyo, hatutakiwi kutafuta makosa na kuhukumu kila mmoja na mwenzake. Badala yake tunatakiwa kupendana, kutiana moyo, na kujengana sisi kwa sisi (1 Wathesalonike 5:11) ili kuwa wanafunzi wa Yesu wanaofaa unafunzi.

Glenn Townend ni Mwenyekiti wa eneo la kanisa la Waadventista wa Sabato kusini mwa Pacific lililo katika **Sydney kule Australia**.

Maswali ya Tafakuri:

- Elezea uzoefu katika maisha yako ambapo Yesu alikusaidia kukuza tumaini lako na Imani yako kwake.
- Ni tabia zipi za ibada zilizokusaidia kuwa na Yesu? Ni zipi unazoona kuwa changamoto? Kwa nini?
- Unapenda nini katika kumfuata Yesu? Watu wengine watajuaje kwamba unamfuata Yesu? Umepataje uzoefu wa kutumwa kwenda – nyumbani, shuleni, kazini, kubariki wengine?

⁹ Ellen G. White, *Education* (Mountain View, Calif.: Pacific Press Pub. Assn., 1903), p. 19.

Somo la Jumatatu

KUKUA KAMA MWANAFUNZI WA YESU

Kupata Uzoefu wa Uwepo Wake

Na S. Joseph Kidder

Tunajifunza kutoka kwenye Maandiko kwamba zoezi la kukua katika Kristo ni muhimu. Kukua huku kunatokea kupitia katika kusoma Biblia, kuomba, kuabudu na kumsifu Mungu, kushirikiana na waumini, kuufikia ulimwengu kupitia katika huduma na uinjilisti, na kuweka katika utendaji uwepo wa Mungu. (Matendo ya Mitume 2:42-47; 4:32-36)

AHADI YA MUNGU YA MARA KWA MARA

Katika Agano la Kale sehemu zote, Mungu anarudia kusema kuwa, “nitakuwa pamoja nawe.” Hii ni ahadi yake ya mara kwa mara. Mwanzoni alikuwa pamoja na Adam na Hawa katika bustani ya Eden (Mwanzo 2:4-3:24). Alitupatia Sabato ya kila juma kwa sababu alitaka kuwa pamoja nasi siku nzima (Mwanzo 2:1-3). Hata baada ya kuanguka dhambini, bado aliagiza Israeli kumjengea hekulu kama ishara ya uwepo wake pamoja nao. (Kutoka 25:8)

Uhalisia mkuu wa uwepo wa Mungu pamoja nasi ni Yesu. Hata jina lake Emanueli linatangaza kwamba Mungu yuko pamoja nasi (Mathayo 1:23; Isaya 7:14). Kabla Yesu hajapaa kwenda mbinguni, aliahidi kwamba angakuwa pamoja nasi siku zote hata ukamilifu wa dahari (Mathayo 28:20). Alitupatia Roho Mtakatifu akae pamoja nasi, na ndani yetu milele (Yohana 14:16, 17). Kilele cha vizazi ni kuwa na Yesu milele hapo atakapokuja mara ya pili (Ufunuo 21:3)

Mungu yuko pamoja nasi muda wote. Tunaweza kutokuhisi uwepo wake, lakini hiyo haisababisi huo usiwe ukweli. “Naye Bwana, yeye ndiye atakayekutangulia, atakuwa pamoja nawe, hatakupungukia wala kukuacha; usiogope wala usifadhaika.” (Torati 31:8). Hii ni ahadi ya Mungu kwetu leo. Maana ya kupata uzoefu wa Mungu ni nini?

1. TUNAPENDWA

Hivi karibuni nikisafiri kwa ndege kutoka Houston kwenda Chicago nilikaa karibu na mtendaji wa kampuni moja ya mawasiliano. Yeye alikuwa amesafiri duniani kote na mara nyingi alipitisha siku nyingi bila kufika nyumbani. Aliikosa familia yake sana na alikuwa na namba ya simu iliyokuwa maalum kwa ajili ya matumizi ya nyumbani tu. Kwa kawaida miito yote ilichujwa, lakini familia iliweza kumpigia wakati wowote, na walijua kwamba lazima atajibu tu.

Aliniambia kwamba “hakuna sauti tamu kwangu kuliko ile ya mke wangu na Watoto wangu. Nitaacha kila kitu ili kujibu simu yao na kujiunganisha nao.” Mazungumzo yetu yalinikumbusha kwamba ninatakiwa kuwa na simu ya moja kwa moja na Baba wa

mbinguni. “Bwana yu karibu na wote wamwitao, Wote wamwitao kwa uaminifu.” (Zaburi 145:18). Kamwe haoni kama ninamuingilia ninapomsogelea kwa maombi. Ninapougua au kukata tamaa, anakuja hapa chini na kunifariji au anawaagiza wengine kunifikia na kunifariji kwa niaba yake. Ninaposisimka kwa furaha, ninaweza kumwita. Ninakuwa na muunganiko naye moja kwa moja.

Kwa Ellen G. White, utimilifu wa uhalisia wa upendo wa Mungu ni ule uwepo wake pamoja nasi. “Kwa kuwa Yesu alikuja kukaa pamoja nasi, tunafahamu kwamba Mungu anajua majaribu yetu, anatuhurumia tuapohuzunika. Kila mwana na binti wa Adam anaweza kuelewa kwamba Muumba wetu ni rafiki wa wenye dhambi. Kwa kuwa katika kila fundisho la neema, kila ahadi ya furaha, kila kitendo cha upendo, kila mvuto wa kimbingu unaoletwa katika maisha ya Mwokozi hapa dniani, tunamwona “Mungu akiwa pamoja nasi.”¹⁰

2. KAMWE HATUKO PEKE YETU

Uwepo wa Mungu unajidhihirisha kwa kila namna tunayohitaji. Kwa yatima yeye ni Baba wa milele (Isaya 9:6). Kwa vitoto vichanga vilivyozaliwa, yeye ni Mama mwenye huruma (Isaya 49:15). Kwa wale wanaojiona wapweke, yeye ni Mwenzi wa karibu aliye pamoja nasi siku zote (Zaburi 68:6; 69:33). Kwa wagonjwa, kwa walioachwa, kwa wale wanaopita katika bonde la uvuli w amauti, anaahidi kwamba “Nitakuwa pamoja nawe” (Isaya 43:2)

Jambo moja la kuisimua kuhusu uwepo wa Mungu ni furaha inayoletwa na uwepo wake. “Utanijulisha njia ya uzima; Mbele za uso wako ziko furaha tele; Na katika mkono wako wa kuume Mna mema ya milele.” (Zaburi 16:11). Ninafahamu kwamba pamoja na hali ninayopitia, pamoja na mahali nilipo, Mungu siku zote yuko nami, akinisaidia kukabiliana na maisha kwa kujiamini na tumaini.

3. KUFANYA UWEPO WA MUNGU KUWA HALISI KATIKA MAISHA YAKO

Mungu siku zote anatafuta kujidhihirisha kwetu katika kila sehemu ya maisha yetu. Anatusihi tumtafute kwa moyo wetu wote. Anatuambia jinsi ya kumtafuta katika Yeremia 29:12-14 “Nanyi mtaniita, mtakwenda na kuniomba, nami nitawasikiliza. Nanyi mtanitafuta na kuniona, mtakaponitafuta kwa moyo wenu wote. Nami nitaonekana kwenu, asema Bwana, nami nitawarudisha watu wenu waliofungwa, nami nitawakusanya ninyi, nikiwatoa katika mataifa yote, na katika mahali pote, nilikowafukuza, asema Bwana; nami nitawaleta tena, hata mahali ambapo kutoka hapo naliwafanya mchukuliwe mateka.” Tambua kwamba kuna masharti mawili: ‘kumwita’ na ‘kumtafuta.’

¹⁰ Ellen G. White, *The Desire of Ages* (Mountain View, Calif.: Pacific Press Pub. Assn., 1898, 1940), p. 24.

4. NIITE

Tunajitenga mbali na Mungu tunapokuwa tumevurugwa na vitu kama kazi, na mahangaiko ya mtindo wetu wa maisha. Tatizo haliko upande wake – liko upande wetu. Tunaweza kudai kuwa tuko karibu na Mungu lakini tusiishi tukiwa na uhakika huo. Zungumza naye kila siku kuhusu masuala katika maisha yako. Shiriki maisha yako pamoja naye. Mwache akuongoze na kukubariki.

Majuma machache yaliyopita, iliniwia vigumu kupata usingizi. Kuna hali ya maudhi ilikuwa inajirudia katika fikra zangu. Katika hali hiyo ya uchovu niliamka na kujaribu kutazama runinga, lakini niliendelea kusikia sauti laini ikisema, “Niite mimi.” Nilifungua Biblia yangu katika Matendo ya Mitume 2:25, 26: “... Nalimwona Bwana mbele yangu siku zote, Kwa kuwa yuko upande wa mkono wangu wa kuume, nisitikisike. Kwa hiyo moyo wangu ukapendezewa, ulimi wangu ukafurahi; Tena mwili wangu nao utakaa katika matumaini.” Hisia za amani na utulivu zilinipata. Nikapeleka hali yangu hiyo kwa Mungu kwa maombi. Uwepo wake uliniletea furaha na tumaini. (Matendo ya Mitume 2:28), na mara moja nilipata usinginzi.

5. NITAFUTE

Tunatakiwa kumtafuta Mungu kwa bidi kila siku. Kama ningekuwa ninataka kuwa na mke wangu kwa majuma machache tu, tusingekuwa na ndoa ya kudumu. Ninataka niwe na mke wangu na pia afahamu kwamba ninamuwaza wakati wote. Wakati mwingine kwa kusudi kabisa ninapanga muda wa sisi kuwa pamoja peke yetu. Hata kama tumeoana zaidi ya miaka 40, bado ninasisimka kuwa naye na kujifunza zaidi kumhusu. Viyo hivyo tunatakiwa kukusidia kabisa kumtafuta Mungu. Tunapoweka pembeni mambo yanayotutoa katika usikivu, tukatenga muda kumtafuta Mungu, tutabarikiwa kwa kumfahamu yeye. Tutabadilishwa kwa “uweza wa kufufuka kwake.” (Wafilipi 3:10)

Dhamiria kutafuta uwepo wa Mungu kila siku. Hayuko mbali kuliko maombi yetu.

S. Joseph Kidder ni profesa wa teolojia ya uchungaji na uanafunzi katika Seminari ya Teolojia ya kanisa la Waadventista wa Sabato katika Berrien Springs, Michigan kule Marekani.

Maswali ya Tafakuri:

- Hebu fikiria tukio ambao ulihisi uwepo wa Mungu kwa namna ya kushurutishwa.
- Unaweza kufanya nini ili kudhamiria kutambua uwepo wa Mungu katika maisha yako ya kila siku?
- Orodhesha mambo katika maisha yako yanayokufurahisha na yanayokuhuzunisha. Unapataje uzoefu wa uwepo wa Mungu katika kila moja ya hayo?

KUISHI KAMA MWANAFUNZI (WA YESU)

Na S. Joel Okindoh

Tumeitwa kuishi kama wanafunzi wa Kristo nyumbani kwetu, kazini, shuleni, sokoni, na hata ng'ambo ya hapo. Yeye ni nuru ya ulimwengu (Yohana 1:4). Ikiwa anaishai ndani yako, itadhihirika kwa wale wanaokuzunguka. Elimu yako ya Mungu haiwezi kufichika. Wala haiwezi kuwa ha faragha, ikifahamika kati yako wewe na Mungu pekee. Ni lazima elimu hiyo ibariki wengine. “Wale wafuasi wa Kristo katika kila kizazi walitakiwa kuwa nuru kwa ulimwengu kama Bwana wao alivyokuwa.”

Wakati fulani zamani nilihudhuria kwenye msiba wa mzee mmoja wa kanisa kule Kenya. Mke wake na vijana wake wakubwa walishuhudia kuhusu maisha yake kwa namna iliyogusa kila mwombolezaji. Mama alisema, “Katika harusi yetu, aliahidi kunipenda, na kwa kweli alinipenda kwa dhati hadi kifo chake.” Watoto nao walishuhudia kwamba hayo aliyosema mama yao ni kweli. Kama Mkristo na mzee wa kanisa, kwa kweli alidhihirisha upendo wa Mungu kwa mwenzi wake na kwa Watoto wake. Huku ni kuishi kama mwanafunzi!

WANAFUNZI WAKIELEZEWA.

Kwa lugha ya kawaida, mwanafunzi ni mfuasi wa mwalimu. Katika lugha ya Kiebrania, mwanafunzi ni yule anayeigiza kwa uhai mafundisho na maisha ya bwana wake – yule anayeweka katika utendaji kile alichojifunza. Swali kubwa kwa wafuasi wa Kristo ni hili: Je, Yesu angefanya nini kama angekuwa katika nafasi yangu? Basi hicho ndicho ninachopaswa kufanya! (Wafilipi 3:10, 11)

Siku zote ni changamoto kuishi kile unachodai kuwa. Watu wanaokuzunguka wanataka uthibitisho kwamba wewe ni halisi. Biblia imejaa mifano ya watu ambao waliishi kama wanafunzi halisi wa Yesu. Waliiga maisha yake na kuishi mafundisho yake.

Paulo anawatia moyo waumini kwa kusema kuwa, “Mnifuate mimi kama mimi ninavyomfuata Kristo.” (1 Wakorintho 11:1). Yoshua anatamka mbele ya viongozi wote wa Israeli kwamba, “Nanyi kama mkiona ni vibaya kumtumikia Bwana, chagueni hivi leo mtakayemtumikia; kwamba ni miungu ile ambayo baba zenu waliitumikia ng'ambo ya Mto, au kwamba ni miungu ya wale Waamori ambao mnakaa katika nchi yao; lakini mimi na nyumba yangu tutamtumikia Bwana.” (Yoshua 24:15)

MWONGOZO WA KIBIBLIA

Maandiko yanawataka wenzi walio katika ndoa kuishi kama wanafunzi halisi wakiwa nyumbani. “Enyi waume, wapendeni wake zenu, kama Kristo naye alivyolipenda Kanisa,

akajitoa kwa ajili yake; ili makusudi alitakase na kulisafisha kwa maji katika neno; apate kujiletea Kanisa tukufu, lisilo na ila wala kunyanzi wala lo lote kama hayo; bali liwe takatifu lisilo na mawaa. Vivyo hivyo imewapasa waume nao kuwapenda wake zao kama miili yao wenyewe. Ampendaye mkewe hujipenda mwenyewe. Maana hakuna mtu anayeuchukia mwili wake po pote; bali huulisha na kuutunza, kama Kristo naye anavyolitendea Kanisa. Kwa kuwa tu viungo vya mwili wake.” (Waefeso 5:25-30). “Kadhalika ninyi wake, watiini waume zenu; kusudi, ikiwa wako wasioliamini Neno, wavutwe kwa mwenendo wa wake zao, pasipo lile Neno; wakiutazama mwenendo wenu safi, na wa hofu.” (1 Petro 3:1, 2)

Ikiwa ninyi ni wazazi, uanafunzi wenu unadhihirishwa kwa namna mnavyoingiliana na watoto wenu. “Nanyi, akina baba (au wazazi), msiwachokoze watoto wenu; bali waleeni katika adabu na maonyo ya Bwana.” (Waefeso 6:4)

Ikiwa wewe ni mtoto, kuishi kama mwanafunzi kunahitaji uwatii wazazi wako, “Enyi watoto, watiini wazazi wenu katika Bwana, maana hii ndiyo haki. Waheshimu baba yako na mama yako; amri hii ndiyo amri ya kwanza yenye ahadi, Upate heri, ukae siku nyingi katika dunia.” (Waefeso 6:1-3)

Paulo anawaonya vijana kuthibitisha uanafunzi wao kupitia katika mwenendo wao. “Mtu awaye yote asiudharau ujana wako, bali uwe kielelezo kwao waaminio, katika usemi na mwenendo, na katika upendo na imani na usafi.” (1 Timotheo 4:12)

Mtume Petro aliwapa changamoto wazee wa makanisa kuishi kama wanafunzi halisi: “Nawasihi wazee walio kwenu, mimi niliye mzee, mwenzi wao, na shahidi wa mateso ya Kristo, na mshirika wa utukufu utakaofunuliwa baadaye; lichungeni kundi la Mungu lililo kwenu, na kulisimamia, si kwa kulazimishwa, bali kwa hiari kama Mungu atakavyo; si kwa kutaka fedha ya aibu, bali kwa moyo. Wala si kama wajifanyao mabwana juu ya mitaa yao, bali kwa kujifanya vielelezo kwa lile kundi. Na Mchungaji mkuu atakapodhihirishwa, mtaipokea taji ya utukufu, ile isiyokauka.” (1 Petro 5:1-4)

HITAJI MUHIMU

Kuishi kama mwanafunzi halisi ni muhimu. Katika siku hizi za mwisho, mwovu na malaika wake wanafanya kazi bila kuchoka kuhakikisha ili kwamba waumini wanabakia katika hali ya kuridhika wakiwa uvuguvugu. “Lakini ufahamu neno hili, ya kuwa siku za mwisho kutakuwako nyakati za hatari. Maana watu watakuwa wenye kujipenda wenyewe, wenye kupenda fedha, wenye kujisifu, wenye kiburi, wenye kutukana, wasiotii wazazi wao, wasio na shukrani, wasio safi, wasiowapenda wa kwao, wasiotaka kufanya suluhu, wasingiziaji, wasiojizuia, wakali, wasiopenda mema, wasaliti, wakaidi, wenye kujivuna, wapendao anasa kuliko kumpenda Mungu; wenye mfano wa utauwa, lakini wakikana nguvu zake; hao nao ujiepushe nao.” (2 Timotheo 3:1-5)

Hebu kama vile Paulo, tamaa yenu kubwa na iwe ni kumfahamu Kristo na kuwa kama yeye: “ili nimjue yeye, na uweza wa kufufuka kwake, na ushirika wa mateso yake, nikifananishwa na kufa kwake; ili nipate kwa njia yo yote kuifikia kiyama ya wafu. Si kwamba nimekwisha kufika, au nimekwisha kuwa mkamilifu; la! Bali nakaza mwendo ili nipate kulishika lile ambalo kwa ajili yake nimeshikwa na Kristo Yesu. Ndugu, sijidhanii nafsi yangu kwamba nimekwisha kushika; ila natenda neno moja tu; nikiyasahau yaliyo nyuma, nikiyachuchumilia yaliyo mbele; nakaza mwendo, niifikilie mede ya thawabu ya mwito mkuu wa Mungu katika Kristo Yesu.” (Wafilipi 3:10-14)

Joel Okindoh ni kaimu mwenyekiti wa Divisheni ya Afrika Mashariki na Kati ya kanisa la Waadventista wa Sabato, na anaishi karibu na Nairobi, Kenya.

Maswali ya Tafakuri

- Ni wakati gani mtu anapokuwa mwanafunzi wa Yesu Kristo?
- Je, inawezekana kushiriki nuru yako na wale walioko mbali wakati huo huo ukashindwa kushiriki na wale walioko karibu na wewe?
- Jukumu la Roho Mtakatifu katika uanafunzi ni nini?

Somo la Jumatano

KUFANYA WANAFUNZI

Wito Mkuu

Na Tara Vincross

Maisha ya Ukristo ni maisha yaliyojengeka katika utendaji. Mhubiri mmoja alishiriki msemu ninaouona kuwa wa msaada. Hebu fikiria unataka kuwa na afya bora zaidi. Unaweza kutaka kuanza mazoezi, kujenga misuli, au kuwa na mwili unaoweza kunyumbulika, ili uweze kwenda kwenye nyumba ya mazoezi iliyopo mahalia na kujisajili kuwa mwanachama. Kila juma unapoenda pale wanakuelekeza kwenye chumba cha kusikiliza hotuba. Wanakueleza mkao wa mwili wako unapoenda kunyanyua vitu vizito, jinsi ya kufanyiza kazi misuli ya moyo, namna ya kujinyoosha mwisho wa mazoezi hayo. Kila juma unaenda kwenye nyumba ya mazoezi kukaa na kusikiliza, kisha unarudi nyumbani. Hata siku moja haujawahi kuambiwa uende kuanza kufanya mazoezi.

Je, utapata mabadiliko kwenye mwili wako? Utaanza kujisikia imara? La hasha, hauwezi. Ni mpaka hapo utakapofanyia mazoezi kile unachojifunza ndipo utakapoanza kuona mabadiliko. Hatuwezi kufahamu taarifa kuhusu afya, ni lazima tuweke katika utendaji afya zetu: tukifanyiza mazoezi misuli yetu, tukijinyoosha, tukicheza, tikikimbia, tukifanya kila kitu tunachoweza.

Ni rahisi kuona ukweli, lakini ni vigumu kuuweka katika utendaji. Kumfuata Yesu siyo suala la kuamini tu - ni suala la kuweka Imani hiyo katika utendaji. Ni kufanyiza mazoezi Imani yetu ndiko kunakoweza kuweka Imani yetu katika utendaji.

Unaporejea na kuangalia mwaka mmoja au miwili hivi iliopita, unaona kwamba mahadhi ya maisha yako yanaonekanaje? Umedhamiria namna gani kuweka Imani yako katika utendaji? Pengine umekuwa ukijaribu kufanya mambo mengi kama mtoto katika kusoma kwa mtandao huku ukifanya kazi ya kudumu. Pengine umempoteza mpendwa fulani aliyekuwa karibu nawe. Pengine umekuwa ukishughulika na mambo makubwa yasiyoeleweka au mashaka fulani katika msimu huu.

Ninataka kutambua kile ambacho umepitia au tumepitia. Mungu ametuvusha kwa uaminifu, hata hivyo bado kumekuwa na ugumu. Pengine umepoteza baadhi ya utendaji wako wa awali. Sina uhakika pale unapojitokeza kwa usahihi, bali ninafahamu hili: kwamba Mungu anataka kukutana nawe pale pale ulipo katika safari yako.

Ninaamini kwamba Mungu anaita kufanyia mazoezi uanafunzi, kuweka katika utendaji Imani yetu, ni muhimu kwetu kuelewa namna ya kukabili uanafunzi kwa ujumla wake.

Uanafunzi kwa ujumla wake unahusu kufahamu (kichwa), kuwa (moyo), na kutenda (mikono). Tunajishughulisha na ukuaji; kisha ni lazima tuuweke katika utendaji, tukishiriki uzoefu tulio nao na Bwana wetu. Ndiyo maana ya kufanya wanafunzi. Katika Ufunuo 12:11 tunasoma kuwa tunashinda kwa damu ya Mwana kondoo na kwa neno la ushuhuda wetu. Neno la ushuhuda wako ni kitendo cha kufanya wanafunzi. Kushiriki kisa cha namna Mungu alivyotenda katika maisha yako.

UANAFUNZI NI NINI?

Neno hili ni gumu kwetu kwa sababu watu wanalitafsiri kwa namna tofauti. Kwa kawaida mtu anaposema “uanafunzi,” anakuwa na maana moja kati ya hizi mbili:

1. Safari yangu mwenyewe ya kumfuata Yesu, au
2. Vitendo vyangu vinavyowasaidia wengine kukua katika safari yao wakiwa na Yesu.

Uanafunzi kama unavyodhihirishwa katika Maandiko, unajumuisha vipengele vyote hivyo viwili: kuwa mwanafunzi na kufanya wanafunzi. Yesu alisema kuwa, “Nifuateni, nami nitawafanya kuwa wavuvi wa watu.” (Mathayo 4:19). Kuwa mwanafunzi ni mchakato wa kukua katika Kristo maisha yako yote. Sehemu ya uanafunzi ni jinsi Mungu anavyotumia maisha yetu kuwafanya wanafunzi wengine wakue.

Kuwa mwanafunzi ni kuishi katika mkao wa kujifunza. Huku kukua kunafanyika kwa muktadha wa jumua. Kama mchungaji wa ibada katika kanisa la Collegedale kule Tennessee kwa jina Jim Moon anavyoiweka: Kuishi katika uhusiano wa karibu na Mungu na utume kwa ulimwengu, ni lazima vifanyike kwa ushirika na wengine.”

KWA NINI KUZUNGUMZA KUHUSU UANAFUNZI?

Ninaamini kwa dhati kwamba kanisa linamfanya Mungu asiyeonekana aonekane. Kwamba watu wa Mungu wanaonesha jinsi upendo ulivyo kwa sababu Mungu yuko ndani yao inahusu kile tunachofanya na namna tunavyokifanya. Ellen G. White anakazia kazi maalum ya Mungu kupitia katika kanisa lake akisema kuwa, “Kanisa ni sehemu moja tu ambapo Mungu amewekeza kwa namna ya pekee staha ya juu sana, pamoja na kudhoofu kwake na kuonekana kuwa na mapungufu. Hii ni jumba la maonesho la neema yake, ambapo anafurahi kuonesha uwezo wake wa kubadilisha mioyo.”¹¹ Hebu fikiria tu: Mungu anaonesha dunia neema, upendo nguvu ya kubadilisha kupitia kwako wewe na mimi. Matendo yako na matendo yangu yana umuhimu.

Ninajali kwa undani kuhusu uanafunzi kwa sababu nafasi ninayochukua pamoja na Mungu, jumua ambayo Mungu amelea katika uhai wangu, na kusudi ambalo Mungu amenipatia katika kujiunga na utume wa Yesu, ni wokovu kwa maisha yangu. Mimi ni mwanafunzi mwenza

¹¹ Ellen G. White, *The Acts of the Apostles* (Mountain View, Calif.: Pacific Press Pub. Assn., 1911), p. 12.

katika safari yangu tukiwa pamoja nawe, na kushiriki kutoka katika maeneo yanayoumiza, na yale yenye matumaini ambapo uzima na huduma vinatokea.

Ninao mbaraka wa kutumika kama mchungaji katika kanisa la Kilima cha Azure. Katika eneo langu kuna watu zaidi ya milioni nne ambao tunaomba warejee katika muunganiko wa kina na upendo wa Yesu uokoao. Ninatumika nikishirikiana na wachungaji na wazee wa makanisa mahalia, tukijiunga katika utume wa Mungu kwa pamoja. Kama wanafunzi, tumeitwa ili kubadilishwa, na kugeuzwa kupitia katika uwezo wa Roho Mtakatifu.

Kwa kweli ni lazima uanze na wewe mwenyewe. Hauwezi kutoa kile ambacho haujapata uzoefu wake. Kama Ellen G. White anavyoshuhudia kuwa, “Wahudumu (au wanafunzi) hawawezi kuwapatia wengine kile ambacho wao hawana... Wengi wana uwezo wa kuzungumza kuhusu dondoo za mafundisho ya Imani, lakini wanazembea mafundisho ya Yesu. Wanaume na wanawake kama hao hawawezi kuwa mbaraka kwenye kibweta au hata kando ya moto.”¹²

Je, unahitaji nini ili ubaki ukiwa umeshikiliwa na nanga, ukidumu kama mwanafunzi wa Yesu? Bila kuwa na hilo jambo, hauwezi kuwa na matokeo bora katika kufanya wanafunzi.

WITO MKUU

Kwa miaka 12 iliyopita, nimetumia mtaala nilioandika unaoitwa *Wito Mkuu: Katika Kuwa, na Kukuza Wanafunzi* (AdventSource, 2020). Kila mwaka nimekuwa na kikundi cha watu 12-16 ambao nimesafiri nao kupitia katika mchakato wa huu Wito Mkuu. Hivi vikundi vyenye vizazi mchanganyiko vimehusisha kila umri katika kuwa wanafunzi, na kufanya wanafunzi. Katika eneo lililotengwa kwa ajili ya kuunganika na Mungu, Yeye ameenenda na kutenda kwa namna isiyo ya kawaida. Siyo suala la cheti cha kuhitimu utakachotundika ukutani na kuishia hapo. Kuwa mwanafunzi na kufanya wanafunzi ni safari ya maisha yote.

Wito Mkuu ni mtaala wa uanafunzi uliobuniwa ili kutekelezwa katika jamii wa majuma 12. Umeundwa kufuatia namna ya kugundua na kuweka katika utendaji miito minane ya Mungu: ibada, maombi, pumziko, jumuia, uponyaji, ushuhudiaji, kutumika na kubariki. Kitendo cha kuwa mwanafunzi hakiwezi kutenganishwa na kufanya wanafunzi. Ikiwa maombi yangu mwenyewe yanazama, ni uzoefu uliopita kwa wale wanaonizunguka kwa namna ninavyoshuhudia.

Utendaji unaodhihirishwa katika miito hii minane, unatupatia muundo wa kukua kiroho. Kupitia katika upendo kwa Yesu unaokua, ukichochea na muda wa kuwa katika Maandiko, maombi, utumishi na kubariki, mabadiliko yanakuwa endelevu. Wito Mkuu unatumia wakati katika kufundisha, wenzi wa kiroho, vikundi vidogo, majengo ya jumuia, huduma za karibu na

¹² Ellen G. White, in *Review and Herald*, Sept. 2, 1890.

mikutano ya mapumziko – vyote hivi vikiwa na lengo la kutoa nafasi kwa Mungu kutenda katika maisha ya wale wanaoshiriki.

IMANI KATIKA MATENDO

Mzee wa kanisa katika moja ya makanisa yangu amekuwa Mwadventista kwa sehemu kubwa ya maisha yake. Kadiri alivyopitia katika safari ya uanafunzi wa huu Wito Mkuu, aligundua kwamba Mungu alikuwa anamwita kuingia eneo jipya. Kwa kipindi chote hicho kwa maombi na ibada, Mungu alimwongoza katika kufanya wanafunzi.

Siku zote alikuwa mtu mwenye haiba ya urafiki, akiwafahamu majirani na kuwasaidia kila alipoweza. Lakini alitumia muda wake mwingi na wale waliokuwa wakimzunguka, akisikiliza mahitaji yao kwa undani, alijikuta akifungua Biblia pamoja nao. Ushuhuda wake pamoja na kuomba nao viliwaongoza kutenga muda wa kushiriki Maandiko pamoja nao.

Ilikuwa ni furaha yangu kubwa kusimama katika maji ya ubatizo tukiwa naye wakati tunawabatiza majirani wake, hao wawili Mungu aliwaongoza katika Imani kwa kusoma naye Biblia. Kadiri alivyosema kuwa, “Sikuwahi kuota kwamba Mungu angefanya jambo kama hili kupitia kwangu.” Mungu aliwaleta wawili hawa katika familia ya Imani, na jumua yetu ikastawisha maisha yao. Jambo zuri ni kwamba hawa wawili baadaye waliwafikia wengine na kuwaleta katika ushirika.

Kwa wastani wanadamu wanaishi sik 27,350. Swali ni kwamba, tutatumiaje siku hizi? Je tujiunge katika tukio kubwa lisilo la kawaida tunaloweza kudhani, tukiunganika na Yesu na kufanya wanafunzi? Tunahitaji kwa juhudi kubwa kutenga nafasi kwa ajili ya kuweka Imani yetu katika utendaji. Kadiri tunavyofanya hivyo, ninafahamu kwamba tutashuhudia kazi ya Mungu inayobadilisha.

Mkashikiliwe katika upendo kadiri mnavyopitia uzoefu wa kazi ya Mungu inayobadilisha katika maisha yenu. Mkafahamu furaha ya kujiunga na Mungu katika utume wa kushiriki upendo wa Yesu kuufikia ulimwengu.

Tara VinCross ni mchungaji katika kanisa la Kilima cha Azure kule Grand Terrace, California anapoishi na mume wake na Watoto wawili. Yeye ni mwandishi wa mfululizo wa *Deep Calling Discipleship* na kitabu kingine cha Watoto kiitwacho *God Loves Me and All My Feelings*

Maswali ya Tafakuri

- Ni kwa jinsi gani uzoefu wa upendo wa Yesu umegusa mtazamo wako wa utume wake wa kufanya wanafunzi?
- Ni mambo gani yanaleta uhai ndani yako?
- Ni watu gani unaowaona kama mzigo wako wa kuombea?

GHARAMA YA KUWA MWANAFUNZI

Na Anna Galeniece

“Tena ufalme wa mbinguni umefanana na hazina iliyositirika katika shamba; ambayo mtu alipoiona, aliificha; na kwa furaha yake akaenda akauza alivyo navyo vyote, akalinunua shamba lile.” (Mathayo 13:14)

MABISHANO YA WANADAMU

Kuwa mwanafunzi wa Yesu ni jambo zuri sana, lakini siyo bure – kuna gharama. Wengine wanaweza kuuliza kuwa, “Kwa nini kumfuata Yesu kuna gharama? Tunahitaji kulipa nini hasa ili kuwa wafuasi wake? Je, Mungu siyo Tajiri kiasi cha kutupatia na kuruhusu tumfuate bure, bila gharama yoyote? Yeye anamiliki kila kitu (Zaburi 50:10); kwa hiyo anapaswa kuelewa hali yetu na kutukubali jinsi tulivyo. Watu wengine wanaweza kubisha na kusema, “Ninalipa, na wewe unatoa.” Katika hali kama hii, Mungu angewatii kwa sababu wanaagiza na kuamuru taratibu na sheria.

Haijalishi mabishano yenu yamekuwa yakihusu gharama ya kumfuata Yesu; ukweli ni kwamba hahitaji fedha yako. Anachohitaji ni wewe umpatie moyo wako uliochafuka kwa dhambi kwa sababu ndicho kitu cha thamani ulicho nacho. Yesu anataka “kuutakasa, kuusafisha kwa damu yake mwenyewe, na kukuokoa kwa upendo wake usiopimika. Na hata hivyo watu wanadhani ni vigumu kuacha vyote!”¹³

MAFUNDISHO YA YESU

Huduma ya Yesu hapa duniani ilikuwa na mguso wa injili kwa mioyo ya watu na kuwabadilisha kulingana na viwango vya ufalme wa Mungu. Kusudi la mifano ya vielelezo lilikuwa ni kudhihirisha uhalisia wa mbingu katika lugha ya kidunia ili hata watu wa kawaida wapate mtazamo wa thamani ya umilele mara moja. Kwa hiyo Yesu katika mafundisho yake ya vielelezo, alieleza kwamba ikiwa utataka kumfuata na kuwa mwanafunzi wake, itabidi ulipe gharama.

Kati ya mifano ya vielelezo saba inayopatikana katika Mathayo sura ya 13, miwili inaonesha gharama ya uanafunzi. Katika mfano wa hazina iliyositirika (fungu la 44) na mfano wa lulu ya thamani kubwa (fungu la 45 na 46), Kristo anawasilisha thamani ya ufalme wa Mungu uliopo kwa wale wenye nia ya kuwa sehemu yake. Tunapopata kitu cha thamani, tunauza kila kitu tunachomiliki ili tuweze kukipata hicho cha thamani. Tunapogundua kwamba Mungu

¹³ Ellen G. White, *Steps to Christ* (Mountain View, Calif.: Pacific Press Pub. Assn., 1956), p. 46.

anatupenda upeo, na kwamba uzima wa milele anaoutoa unaweza kuwa wa kwetu tunaacha nyuma kila kitu ili kupata uzima pamoja naye.

MIFANO YA KIBIBLIA

Wanafunzi 12 waliacha maisha waliyokuwa wakiishi pamoja na familia zao ili kumfuata Bwana wao. Swali la Petro kuhusu kile watakachofaidi kwa kujitoa mhanga kiasi hicho, Yesu alijibu na kusema kuwa, “Na kila mtu aliyeacha nyumba, au ndugu wa kiume au wa kike, au baba, au mama, au watoto, au mashamba, kwa ajili ya jina langu, atapokea mara mia, na kuurithi uzima wa milele.” (Mathayo 19:29). Pamoja na gharama kuwa kubwa, Kristo hadai kwamba utweze watu wa familia yako, ingawaje unaweza kujikuta unatofautiana nao. Hapa mkazo upo katika vipaumbele. Wanafunzi wao wanapaswa kumpenda kuliko jamaa zao, mali zao, shughuli zao za kiuchumi au kitu kingine chochote. Hakuna kitu kinachopaswa kuweka kiwingu kwenye upendo wetu kwa Mungu.

Uchaguzi wa Petro wa kumfuata Bwana na kuwakaribisha wengine kufanya hivyo unadhihirisha upendo wake na jinsi alivyojitoa kikamilifu kwa Mungu (Yohana 32:17), lakini pia kujitoa kwake mhanga kwa ajili ya Kristo (Matendo 5:40, 41; 12:4), ambako matokeo yake yalikuwa ni kitendo cha kusulubiwa kwake miguu juu kichwa chini. Alikuwa na nyakati pevu katika misha yake, kama vile usaidizi wa uhakika wa mke wake (1 Wakorintho 9:5), kuona wengine wakimgeukia Mungu (Matendo 2:38, 41), na ahadii ya uzima wa milele (1 Petro 1:3-9).

Uamuzi wa yule mwanamke Msamaria kisimani wa kumfuata Kristo uligharimu kufahamika kwa upande mwingine wa giza wa hadhi yake (Yohana 4). Baada ya kuwa na wanaume watano akiwa anaishi na wa sita ilikuwa inatosha kuepuka kukutana na wanawake bila lazima kisimani wakati akienda kuchota maji. Inaweza kuwa sababu yake ya kwenda kisimani peke yake wakati wa jua kali la mchana. Lakini ilikuwa ni fursa kwa Yesu kukutana naye na kubadilisha maisha yake daima. Baada ya kujadiliana na Mwokozi, mwanamke aliyekuwa akijificha kutoka kwa wakazi wa eneo lile, alikimbia akawaendea, akitangaza kuwa, “Njoni, mtazame mtu aliyeniambia mambo yote niliyoyatenda. Je! Haimkini huyu kuwa ndiye Kristo?” (Yohana 4:29)

Kule kukutana na Kristo kulidhihirisha ukweli wa milele kwa nafsi iliyokuwa na njaa, na hivyo kutoa “mwonekano mpya wa uso wake, badiliko lake kwa ujumla wake.”¹⁴ Mtu hawezi kujutia gharama ya kuachana na maisha ya dhambi. Yule mwanamke aligeuka na kuwa mfuasi wa Yesu aliyezaliwa upya na mmisionari. Mazungumzo yake na Yesu yalifungua mlango kwa Kristo kumhudumia. (fungu la 39042). Uanafunzi wa kwali una gharama kwa sababu unakataa dhambi, ni faida kwa sababu unamhesabia haki mwenye dhambi.

¹⁴ Ellen G. White, *The Desire of Ages* (Mountain View, Calif.: Pacific Press Pub. Assn., 1898, 1940), p. 191.

Luka anatoa kisa kama hicho kuhusu badiliko la Zakayo (Luka 19). Kila mmoja alimchukia huyu mkuu wa watoza ushuru ambaye alidanganya watu na kujilimbikizia mali kutoka wa watu wa nchi yake. Aliposikia Habari za Yesu na uwezo wake wa miujiza, alitafuta jinsi ya kumsikiliza. Upendo wa Yesu ulimfanya ajione mwenye hatia alipokua amejificha katika ule mkuyu. Alikuwa amezidiwa na hisia za kutokustahili kwake.

Mguso wa Roho Mtakatifu ulibadilisha nafsi yake na kumfanya kuachana na mazoea yake ya kutokuwa mwaminifu. Pamoja na kwamba iligharimu mali ya Zakayo, bado ilikuwa ni furaha kwake kufungua moyo wake kwa upendo wa Kristo. Toba ya kweli ya mtu humwongoza katika badiliko kamili la maisha yake. Kwa hiyo kwa kupoteza mali ya duniani alipata amani, familia, na umilele (fungu la 9). Ellen G. White anasema kwamba, “Ni pale Kristo anapopokelewa kama Mwokozi binafsi ndipo wokovu unapoifikia nafsi.”¹⁵ Je, kuna kitu kingine kinachoweza kuwa cha thamani kuliko hiki?

HITIMISHO

Kwa kupata hazina iliyositirika, au lulu ya thamani kubwa, unaweza kupata kile ambacho moyo wako unatamani zaidi – moyo uliozawadiwa unakuwa mwaminifu kwa Mungu. Kwa hiyo, Sulemani anakukumbusha kwamba, “Linda moyo wako kuliko yote uyalindayo; Maana ndiko zitokako chemchemi za uzima.” (Mithali 4:23). Gharama ya uanafunzi inabebeka ukichukulia zawadi ya uzima tele hapa duniani pamoja na mateso kwa niaba ya Kristo (Wafilipi 1:29), na uzima katika umilele kupitia kwake. Hakuna muamala bora kuliko huu. Chagua kulipa gharama, mchague Mungu!

Anna Galeniece ni profesa mwenza wa uchaplensia katika chuo kikuu cha Andrews kule Berrien Springs, Michigan, Marekani. Yeye pia anatumika kama mkurugenzi kwa masomo ya seminari ya kituo cha uchaplensia.

Maswali ya Tafakuri

- Hazina yako kubwa ni nini?
- Ni nini ambacho bado kiko kati yako na Mungu?
- Unawezaje kumruhusu Roho Mtakatifu kubadilisha maisha yako?
- Gharama ya uanafunzi inamaanisha nini kwako

¹⁵ Ellen G. White, *The Desire of Ages* (Mountain View, Calif.: Pacific Press Pub. Assn., 1898, 1940), p. 556.

FURAHIA YA KUWA MWANAFUNZI

Na Dwain N. Esmond

Huyu ni Petro, aliyekuwa jeuri, na mwanafunzi anayejiadini, aliyeuliza swali ambalo inawezekana lilikuwa ni swali bora katika Maandiko yote. Katika aya inayotangulia swali la Petro, Yesu anamjibu mwanasheria kijana aliyeuliza kuwa, “Mwalimu, nitende jambo gani jema, ili nipate uzima wa milele?” (Mathayo 19:16)

Baada ya Yesu kurudia orodha ya amri alizopaswa kushika, alitambua udhaifu wake wa ndani wa kiroho: “Ukitaka kuwa mkamilifu, enenda ukauze ulivyo navyo, uwape maskini, nawe utakuwa na hazina mbinguni; kisha njoo unifuata.” (fungu la 21). Fungu la 22 linateka kile kitakachoonekana kuwa moja ya wasifu wa kusikitisha uliowahi kuandikwa kwa mwanafunzi ambaye hajazaliwa bado: “Yule kijana alipolisikia neno lile, akaenda zake kwa huzuni; kwa sababu alikuwa na mali nyingi.”

Ellen G. White anapotoa maoni kuhusu uamuzi huu wenye matokeo ya kutisha, anasema kuwa, “Ikiwa angetambua thamani ya zawadi iliyotolewa, angejisajili haraka sana kama mmoja wa wafuasi wa Kristo. Alikuwa ni mjumbe wa baraza la Wayahudi lililokuwa likiheshimika sana, na Shetani alikuwa akimjaribu kwa matazamio ya mafanikio yasiyo ya kweli. Alitaka hazina ya mbinguni, lakini pia alitaka faida ya muda ambayo utajiri wake ungampatia. Alisikitika kwamba hali kama hiyo ilikuwapo, alitamani uzima wa milele, lakini hakuwa tayari kujitoa mhanga. Gharama ya uzima wa milele ilionekana kwake kuwa kubwa mno.”¹⁶

Yule kijana alipoenda zake kwa huzuni, Yesu akawageukia wanafunzi wake na kusema kitu ambacho milenia mbili na zaidi baadaye bado kinatustua. “Amin, nawaambieni, ya kwamba itakuwa shida tajiri kuingia katika ufalme wa mbinguni. Nawaambia tena, Ni rahisi zaidi ngamia kupenya tundu ya sindano, kuliko tajiri kuingia katika ufalme wa Mungu.” (fungu la 23, 24). Wanafunzi wake waliguna na kusema kuwa, “Ni nani basi awezaye kuokoka?” (fungu la 25). Hapo ndipo Petro katika mashaka yake aliuliza swali ambalo hakuna mwanafunzi yeyote aliyewahi kuliuliza: “Tazama, sisi tumeacha vyote tukakufuata; tutapata nini basi?” (fungu la 27)

KUNA NINI KWA JILI YETU?

Je, tunaweza kumlaumu Petro kwa kuuliza swali hilo? Mara nyingi Yesu alizungumza kuhusu gharama ya uanafunzi, kama alivyofanya katika Mathayo 16:24 aliposema kuwa, “Wakati huo Yesu aliwaambia wanafunzi wake, Mtu ye yote akitaka kunifuata, na ajikane mwenyewe,

¹⁶ Ellen G. White. *The Desire of Ages* (Mountain View, Calif.: Pacific Press Pub. Assn, 1898, 1940). p. 520.

ajitwike msalaba wake, anifuata.” Tunafahamu gharama ya uanafunzi, lakini je, inalipa? Jibu ni NDIYO! Hapa chini kuna shangwe tano zinawasubiri wale walio tayari kupiga mbizi ndani ya uanafunzi na Yesu – “mchakato wa kuwa kama Yesu kwa kutenga muda wa kuwa naye.”¹⁷

SHANGWE YA MAISHA YENYE KUSUDI

Katika kitabu cha Mathayo 16 fungu la 25 Yesu anatabiri kwa ujasiri kuhusu wanafunzi wote ambao wamechagua kumfuata: “Kwa kuwa mtu atakaye kuiokoa nafsi yake, ataipoteza; na mtu atakayepoteza nafsi yake kwa ajili yangu, ataiona.” Je, kuna huzuni iliyo kubwa katika maisha kuliko huzuni ya kukosa kupata kusudi uliloumbiwa? Hapa Yesu anaahidi kwamba wale wote watakaotoa maisha yao katika utumishi wake, watapata uzima waliopaswa kuuishi, ambao sehemu yake ni kuwa, “wavuvi wa watu” (Mathayo 4:19). Maisha yenye kusudi ni maisha ya shangwe!

SHANGWE YA KUKUBALIWA BILA MASHARTI

Jambo moja ninalopenda zaidi kuhusu wazazi wangu ni kule kuwa tayari kunikubali na kunipenda, hata wakati ninapowahuzunisha. Pamoja na ukubwa wao, kiasi wanachonikubali hakiwezi kulinganishwa na kile cha Yesu. Yesu anatamka kuwa, “Wote anipao Baba watakuja kwangu; wala ye yote ajaye kwangu sitamtupa nje kamwe.” (Yohana 6:37). Umeshawahi kuhisi ile furaha ya ‘njoo-jinsi-ulivyo’ na kukubaliwa na Yesu kusikokuwa na masharti? Uanafunzi na Yesu utakubadilisha, lakini siyo kabla hajakukubali bila masharti.

SHANGWE YA URAFIKI NA KRISTO PAMOJA NA MUNGU

Tunapotembea katika uhusiano na Yesu, tunaingia katika urafiki na Mungu wa ulimwengu wote, na urafiki huu unakuja na faida: “Siwaiti tena watumwa; kwa maana mtumwa hajui atendalo bwana wake; lakini ninyi nimewaita rafiki; kwa kuwa yote niliyoyasikia kwa Baba yangu nimewaarifu.” (Yohana 15:15). Hekima yote na uwezo wa ulimwengu wote upo mahali ambapo kila mwanafunzi aliyeingia katika urafiki na Yesu anaweza kuufikia. Hii ndiyo furaha iletayo amani kwa wanafunzi wengi waliochoshwa na mashaka ya ulimwengu huu.

SHANGWE YA UPONYAJI, PUMZIKO NA KUREJESHA

Katika ulimwengu uliojaa magonjwa na majanga, furaha pekee ni hii gharama stahiki ya kutembea na Yesu. Sasa hivi anatuita akisema kuwa, “Njoni kwangu, ninyi nyote msumbukao na wenye kulemewa na mizigo, nami nitawapumzisha.” (Mathayo 11:28). Ellen G. White anazungumza kuhusu hii ahadi ya pekee kuwa, “Kamwe Bwana hatafanya makadirio yasiyo halisi kuhusu urithi wake. Anawapima watu anaofanya nao kazi. Wanapojitia nira yake, wanapoachana na mahangaiko ambayo hayakuwafaidia chohote kwa ajili ya kumtumikia

¹⁷ *Discipleship Handbook: A Resource for Seventh-day Adventist Members* (Silver Spring, Md.: Review and Herald Pub. Assn., 2018), p. 3.

Mungu, watapata amani na pumziko. Wanapotambua udhaifu wao, mapungufu yao, watafurahi kufanya mapenzi ya Mungu.”¹⁸

SHANGWE YA UZIMA WA MILELE NA ZAIDI

Yesu alijibu swali la Petro, na pengine jibu lake linawakilisha furaha iliyo kuu ya wote. Hebu nikuhakikishie, Yesu alisema kuwa, “...katika ulimwengu mpya, atakapoketi Mwana wa Adamu katika kiti cha utukufu wake, ninyi nanyi mtaketi katika viti kumi na viwili, mkiwahukumu kabila kumi na mbili za Israeli. Na kila mtu aliyeacha nyumba, au ndugu wa kiume au wa kike, au baba, au mama, au watoto, au mashamba, kwa ajili ya jina langu, atapokea mara mia, na kuurithi uzima wa milele.” (Mathayo 19:28, 29). Siku moja, wale wanafunzi wa Yesu wa kweli watatawala pamoja naye milele, yeye aliyetubadilisha kuwa katika mfano wake. Hiyo itakuwa ni furaha isiyoelezeka iliyojaa utukufu! (1 Petro 1:8)

Dwain N. Esmond ni mchungaji aliyewekewa mikono, mwandishi na mhariri. Sasa hivi anatumika kama mkurugenzi mwenza na mhariri katika kitengo cha Ellen G. White Estate ambapo anasaidia katika maandalizi na uchapaji wa mambo yanayohusiana na White Estate.

Maswali ya Tafakuri

- Ni kwa namna gani unaweza kujifananisha na yule kijana Tajiri aliyemjia Yesu?
- Je, umewahi kujitoa mhanga kwa ajili ya Yesu na kupata uzoefu wa mibaraka kama matokeo ya kujitoa huko?
- Je, umewahi kufikiria kujikana nafsi kama uzoefu wa kufurahisha?

¹⁸ Ellen G. White, in *Review and Herald*, Oct. 23, 1900.



Sabato ya Pili

USHAHIDI WA UANAFUNZI WA KWELI

USHAHIDI WA UANAFUNZI WA KWELI

Na Ellen G. White

Yesu alisema kuwa, “Hivyo hutukuzwa Baba yangu, kwa vile mzaavyo sana; nanyi mtakuwa wanafunzi wangu” (Yohana 15:8). Mungu anataka kudhihirisha utakatifu wa tabia yake mwenyewe, ukarimu wake, na huruma yake kupitia kwako. Hata hivyo, Mwokozi hawaambii wanafunzi wake wafanye kazi ili kupata matunda. Anawaambia kukaa ndani yake. Yesu anasema kuwa ‘Ninyi mkikaa ndani yangu, na maneno yangu yakikaa ndani yenu, ombeni mtakalo lote nanyi mtatendewa.’ Ni kwa kupitia katika Neno kwamba Kristo anakaa ndani ya wafuasi wake.

“Huu ni muunganiko ule ule ulio muhimu ambao unawakilishwa na kula mwili wake na kunywa damu yake. Maneno ya Kristo ni Roho na Uzima. Unapoyapokea, unapata uzima wa mzabibu. Unaishi kwa kila neno litokalo katika kinywa cha Mungu.’ Mathayo 4:4. Uhai wa Kristo ndani yako unatoa matunda matunda yale yale kama yaliyo ndani yake. Ukiishi ndani ya Kristo, ukishikamana naye, ukitegemezwa naye, ukipata virutubisho kutoka kwa Kristo, utakuwa na matunda yanayofana na ya Kristo.

“Katika mkutano wake wa mwisho na wanafunzi wake, tamanio kubwa aliloonesha Kristo kwa ajili yao ni kuwa, wapendane wao kwa wao kama Yeye alivyowapenda. Alirudia mara kwa mara akisema, “Haya nawaamuru ninyi, mpate kupendana.” Maneno yake ya kwanza wakiwa naye peke yao katika kile chumba cha juu yalikuwa ni haya: “Amri mpya nawapa, Mpendane. Kama vile nilivyowapenda ninyi, nanyi mpendane vivyo hivyo.”

Hii amri kwa wanafunzi ilikuwa mpya, kwa sababu hawakuwa wanapendana wao kwa wao kama Kristo alivyowapenda. Aliona kwamba dhana mpya pamoja na misukumo ni lazima viwatawale; kwamba ni lazima waweke katika utendaji kanuni mpya; kupitia katika uhai wake na kifo chake, walipaswa kupata mtazamo mpya wa upendo. Amri ya kupendana wao kwa wao ilikuwa na maana mpya katika nuru ya kujitoa kwake kafara. Kazi yote ya neema ni mwendelezo mmoja wa huduma ya upendo, wa kujikana nafsi, wa jitihada za kujitoa kafara. Kila saa ya mapito ya Yesu hapa duniani ilishuhudia kububujika kusikokoma kwa upendo wa Mungu kutoka kwa Yesu. Wote waliojazwa na Roho Mtakatifu watapenda kama yeye alivyopenda. Kanuni iliyomsukuma Kristo itawasukuma kila mmoja katika kushughulika na mwenzake.

Upendo ni Ithibati

“Upendo huu ni uthibitisho wa uanafunzi wao. Yesu alisema kuwa, ‘Hivyo watu wote watatambua ya kuwa ninyi mmekuwa wanafunzi wangu, mkiwa na upendo ninyi kwa ninyi.’

Watu wanapofungamana pamoja, siyo kwa kulazimishwa wala kwa maslahi binafsi, bali kwa upendo, wanaonesha utendaji na mguso ulio juu ya kila aina ya mvuto wa kibinadamu. Pale umoja huu napokua, ni udhibitisho kwamba sura ya Mungu inarejeshwa katika ubinadamu, na kwamba, kanuni mpya ya maisha imepandikizwa. Inaonesha kwamba kuna nguvu katika asili ya kimbingu ya kustahimili wakala wa uovu wasio wa kibinadamu, na kwamba neema ya Mungu imeshinda ule ubinafsi ulio ndani ya moyo wa asili.

“Upendo huu ukidhihirika kanisani, kwa uhakika utachoea hasira ya Shetani. Kristo hakuwaambia wanafunzi wake kwamba mapito yao yatakuwa rahisi. Alisema kwamba ‘Iwapo ulimwengu ukiwachukia, mwajua ya kuwa umenichukia mimi kabla ya kuwachukia ninyi. Kama mngekuwa wa ulimwengu, ulimwengu ungewapenda walio wake; lakini kwa kuwa ninyi si wa ulimwengu, bali mimi naliwachagua katika ulimwengu, kwa sababu hiyo ulimwengu huwachukia. Likumbukeni lile neno nililowaambia, Mtumwa si mkubwa kuliko bwana wake. Ikiwa waliniudhi mimi, watawaudhi ninyi; ikiwa walilishika neno langu watalishika na lenu. Lakini haya yote watawatenda kwa ajili ya jina langu, kwa kuwa hawamjui yeye aliyenipeleka.’” (Yohana 15:18-21). Injili itasonga mbele kwa pambano kubwa, katikati ya upinzani mkubwa, hatari kubwa, upotevu, na mateso mengi. Lakini wale wanaofanya kazi hii, watakuwa wanafuata nyayo za Bwana wao.

Nguvu ya Kumshinda Shetani

“Yesu kama Mkombozi wa ulimwengu, alikabiliwa na kushindwa kusikokoma. Yeye aliye mjumbe wa rehema kwa ulimwengu wetu huu, alionekana kama vile amefanya kidogo kuliko alivyotamani kufanya katika kuwainua na kuwaokoa wanadamu. Mivuto ya Shetani ilidumu kufanya kazi katika kupinga njia zake. Lakini kamwe hakukatishwa tamaa. Isaya kupitia katika unabii wake anasema kuwa, “Nimejitaabisha bure, nimetumia nguvu zangu bure bila faida; lakini hakika hukumu yangu ina Bwana, na thawabu yangu ina Mungu wangu. Na sasa Bwana asema hivi, yeye aliyeniumba tangu tumboni niwe mtumishi wake, ili nimletee Yakobo tena, na Israeli wakusanyike mbele zake tena; (maana mimi nimepata heshima mbele ya macho ya Bwana, na Mungu wangu amekuwa nguvu zangu).”

Ahadi hii imetolewa kwa Kristo, “Bwana, mkombozi wa Israeli, Mtakatifu wake, amwambia hivi yeye anayedharauliwa na wanadamu; yeye anayechukiwa na taifa hili; yeye aliye mtumishi wao watawalao; Wafalme wataona, watasimama; wakuu nao watasujudu; kwa sababu ya Bwana aliye mwaminifu, Mtakatifu wa Israeli aliyekuchagua. Bwana asema hivi, Wakati uliokubalika nimekujibu, na siku ya wokovu nimekusaidia; nami nitakuhifadhi, nitakutoa uwe agano la watu hawa, ili kuiinua nchi hii, na kuwarithisha urithi uliokuwa ukiwa; kuwaambia waliofungwa, Haya, tokeni; na hao walio katika giza, Jionyesheni. Watajilisha katika njia, na juu ya majabali watapata malisho.” Isaya 49:4, 5, 7-10

Yesu alibakia katika neno hili, wala hakumpatia Shetani nafasi. Hawataona njaa, wala hawataona kiu; hari haitawapiga, wala jua; kwa maana yeye aliyewarhemu atawatangulia, naam, karibu na chemchemi za maji atawaongoza.

Wakati ulipofika wa Yesu kupitia hatua zake za mwisho za kudhalilishwa, wakati roho yake ilipokuwa ina huzuni nyingi kiasi cha kufa, aliwaambia wanafunzi wake kwamba, “Mimi sitasema nanyi maneno mengi tena, kwa maana yujua mkuu wa ulimwengu huu, wala hana kitu kwangu... kwa habari ya hukumu, kwa sababu yule mkuu wa ulimwengu huu amekwisha kuhukumwa... Sasa hukumu ya ulimwengu huu ipo; sasa mkuu wa ulimwengu huu atatupwa nje.” Yohana 14:30; 16:11; 12:31.

Kristo alifuatilia kwa jicho la kinabii matukio yaliyokuwa yanakwenda kutokea katika pambano lake la mwisho. Alifahamu fika kwamba atakapotamka kuwa, ‘Imekwisha,’ mbingu yote ingeshangilia kwa ushindi. Sikio lake lilidaka muziki kwa mbali na shangwe za ushindi katika makao ya mbinguni. Alifahamu kwamba mlio wa kengele ya mwisho ya himaya ya Shetani ungesikika, na kwamba jina la Kristo lingetangazwa toka dunia hii hadi dunia nyingine katika ulimwengu wote.

Kristo alishangilia kwamba angeweza kufanya zaidi kwa wafuasi wake kuliko kile wanachoomba hata wanachowaza. Alizungumza kwa uhakika akifahamu kwamba tamko la mwenye uweza lilitolewa kabla ya kuumbwa kwa ulimwengu. Alifahamu kwamba ukweli ukisheheni uwezo wa Roho Mtakatifu ungeshinda katika shindano na uovu; na kwamba bendera yenye damu ingepepea kwa ushindi wa wafuasi wake. Alifahamu kwamba uhai wa wanafunzi wake waliokuwa wakimwamini ungekuwa kama wa kwake ulivyokuwa, yaani mfululizo wa ushindi usioingiliwa, ambao hauonekani kuwapo hapa, bali unatambuliwa kuwapo hapo baadaye kwa upeo mkubwa.

Imani Kama ya Kwake

Yesu alisema kuwa, “Hayo nimewaambieni mpate kuwa na amani ndani yangu. Ulimwenguni mnayo dhiki; lakini jipeni moyo; mimi nimeushinda ulimwengu. Hakuwahi kushindwa, wala kukatishwa tamaa. Wafuasi wake wanatakiwa kudhihirisha Imani kama hiyo yenye asili ya kustahimili. Wanapaswa kuishi kama alivyoishi, na kufanya kazi kama alivyofanya kazi kwa sababu wanamtegemea yeye kama Bwana mtendaji. Ni lazima wawe na ujasiri, nguvu, na ustahimilivu. Ingawaje itaonekana kama kuna vikwazo na vizuizi katika mapito yao, wanatakiwa kusonga mbele kwa neema ya Mungu.

Badala ya kusikitikia magumu wanayokumbana nayo, walipaswa kuyashinda. Hawakutakiwa kukata tamaa kuhusu jambo lolote, na kutumainia yote. Yesu amewafungamanisha na kiti cha enzi cha Mungu kwa mnyororo wa dhahabu wa upendo wake usiopimika. Ni kusudi lake kwamba mvuto mkubwa katika ulimwengu unaotakiwa kutoka kwenye chanzo cha nguvu

zote uwe wa kwao. Wanapaswa kuwa na uwezo wa kukataa uovu, nguvu zisizoweza kushindwa na dunia wala kifo wala kuzimu, nguvu zitakazowawezesha kushinda kama Kristo alivyoshinda.

Kristo amekusudia kwamba agizo la mbinguni, mpango wa serikali ya mbinguni, ule upatanifu wa kimbingu wa mbinguni, uwakilshwe katika kanisa lake hapa duniani. Hivyo katika watu wake atatukuzwa. Kupitia kwao, Jua la Haki litaangaza katika dunia kwa mng'ao uzioweza kuhafifishwa. Kristo ametoa katika kanisa lake vifaa vya kutosha, ili apate mapato mengi ya utukufu kutoka kwa watu wake aliowakomboa, na mali yake aliyoinunua.

Ameweka juu ya watu wake uwezo na mibaraka ili wawakilishe utoshelevu wake mwenyewe. Kanisa lililojaliwa kwa haki ya Kristo, ndipo mahali pake palipokaimishwa ule utajiri wa rehema zake, neema yake, na upendo wake ili kuonekana kwa ukamilifu wa mwonekano. Kristo anawaangalia watu wake katika hali ya usafi na ukamilifu, kama zawadi ya unyenyekevu wake, na nyongeza ya utukufu wake – Kristo, kitovu kikuu, mahali panapotoa nuru na kuangaza utukufu wote.

Mwokozi alihitimisha maagizo yake kwa maneno yenye nguvu ya matumaini. Kisha akamimina mzigo wa roho yake akiwaomba wanafunzi wake. Akainua macho yake kuelekea mbinguni na kusema kuwa, “Baba, saa imekwisha kufika. Mtukuze Mwanao, ili Mwana wako naye akutukuze wewe; kama vile ulivyompa mamlaka juu ya wote wenye mwili, ili kwamba wote uliomba awape uzima wa milele. Na uzima wa milele ndio huu, Wakujue wewe, Mungu wa pekee wa kweli, na Yesu Kristo uliyemtuma.”

Makala hii imetolewa kutoka katika kitabu cha Tuamini la Vizazi Vyote (Mountain View, California; Pacific Press Publication Association, 1898, 1940) uk. 677-680. Waadventista wa Sabato wanaamini kwamba Ellen G. White aliyeishi kati ya mwaka 1827 na 1915 alidhihirisha kipawa cha Biblia cha unabii kwa kipindi cha zaidi ya miaka 70 ya huduma yake ya hadhara.

Maswali ya Tafakuri

- Je, tunawakilishaje tabia ya Kristo kwa ulimwengu?
- Jadili dhana ya “Kuishi kama Kristo alivyoishi, kufanya kazi kama alivyofanya kazi.”
- Je, kusudi la Kristo liliathirije namna alivyoishi na kufanya kazi?
- Ni silaha gani tunazoweza kutumia ili kupambana na kukata tamaa, na hofu tunapokabiliana na majaribu?

Nukuu

Watu wanapofungamanishwa na upendo, wanaonesha kazi ya mvuto ambayo inapita mivuto yote ya kibinadamu.